

四庫全書

經部

欽定四庫全書

經部
儀禮述註卷三

詳校官監察御史臣陳化龍

給事中臣溫常綬覆勘

總校官降調編修臣倉聖脈

校對官主事臣陳壩

謄錄監生臣鍾天棟

欽定四庫全書

儀禮述註卷三

士相見禮第三

安溪 李光坡 撰

鄭目錄云士以職位相親始承摯相見之禮○

疏曰爲內合體失夫相見以其新升爲士或士

自相見或士在見卿大夫或卿大夫下見士或

見已國君或士大夫見他國君來朝者新出仕

從微至著以士為先後更有功乃升為大夫已
上故以士為總號也又天子之孤卿大夫士與
諸侯之孤卿大夫士執摯既同相見之禮亦無
別也

士相見之禮○摯冬用雉夏用脍左頭奉之曰某也願
見無由達某子以命命某見

註曰摯所執以至者君子見於所尊敬必執摯以將
其厚意也士摯用雉者取其耿介交有時別有倫也

雉必用死者為其不可生服也夏用牯備腐臭也左
頭頭陽也無由達言久無因緣以自達也某子今所
因緣之姓名以命者稱述主人之意○疏曰某子是
紹介中間之人註云交有時別有倫者倫類也交接
有時至於別後則雖雉不雜謂春交秋別也士之義
亦然又云雉必用死者尚書云一死鄭云士執雉也
義取耿介為君致死也牯乾雉

主人對曰某子命某見吾子有辱請吾子之就家也某

將走見

註曰有又也某子命某往見今吾子又自辱來序其
意也走猶往也

賓對曰某不足以辱命請終賜見

註曰命謂請吾子之就家

主人對曰某不敢為儀固請吾子之就家也某將走見

註曰不敢為儀言不敢外貌為威儀忠誠欲往也固
如故也

賓對曰某不敢為儀固以請

註曰言如故請終賜見

主人對曰某也固辭不得命將走見聞吾子稱摯敢辭
摯

註曰不得命者不得見許之命也走猶出也稱舉也
辭其摯為其大崇也

賓對曰某不以摯不敢見

註曰見於所尊敬而無摯嫌太簡

主人對曰某不足以習禮敢固辭

註曰言不足習禮者不敢當其崇禮來見已

賓對曰某也不依於摯不敢見固以請

註曰言依於摯謙自卑也

主人對曰某也固辭不得命敢不敬從出迎於門外再拜賓答再拜主人揖入門右賓奉摯入門左主人再拜受賓再拜送摯出

註曰右就右也左就左也受摯於庭既拜受送則出

矣不受摯於堂下人君也○疏曰凡門出則以西為右以東為左入則以東為右西為左依賓西主東之位也

主人請見賓反見退主人送於門外再拜

註曰請見者為賓崇禮來相接以矜莊歡心未交也
賓反見則燕矣下云凡燕見於君至凡侍坐於君子博記反見之燕義臣初見於君再拜奠摯而出○疏曰上士冠禮賓士昏納采等皆有禮賓事明此行禮

主人留必不虛宜有歡燕故云則燕矣相見非聘問之禮燕既在寢明前相見亦在寢之庭矣臣始見出君亦當遣人留之燕也下有它邦之人則還摯雖不見反燕臣尚燕它邦有燕可知

主人復見之以其摯曰鄉者吾子辱使其見請還摯於將命者

註曰復見之者禮尚往來也以其摯謂鄉時所執來者也鄉糞也將猶傳也傳命者謂擯相者○疏曰五

等諸侯身自出朝及遣臣出聘圭璋重不可還復朝聘訖即還之璧琮財輕故不還彼朝聘用玉自為一禮有不還之義其在國之臣自執摯相見雖禽摯皆還之臣見於君則不還義與朝聘異不可相決也出接賓曰擯入詔禮曰相一也故聘禮與冠義皆云每一門止一相是謂擯介為相也

主人對曰某也既得見矣敢辭

註曰讓其來答已也○疏曰上言主人者據前為主

金少臣入公言
卷三
人而言此云主人者謂前賓今在其家而說也

賓對曰某也非敢求見請還摯於將命者

註曰言不敢求見嫌褻主人不敢當也○疏曰賓主
頻見是褻故不敢當相見之法直云還摯而已

主人對曰某也既得見矣敢固辭

註曰固如故也

賓對曰某不敢以聞固以請於將命者

註曰言不敢以聞又益不敢當○疏曰上云非敢求

見此云不敢以聞耳聞疏於目見故云又益不敢當也

主人對曰某也固辭不得命敢不從賓奉摯入主人再拜受賓再拜送摯出主人送於門外再拜

士見於大夫終辭其摯於其入也一拜其辱也賓退送再拜

註曰終辭其摯以將不親答也凡不答而受其摯唯君於臣耳大夫於士不出迎入一拜正禮也送再拜

尊賓

若嘗為臣者則禮辭其摯曰某也辭不得命不敢固辭

註曰禮辭一辭其摯而許也將不答而聽其以摯入

有臣道也

賓入奠摯再拜主人答壹拜

註曰奠摯尊卑異不親授也

賓出使擯者還其摯於門外曰某也使某還摯

註曰還其摯者辟正君也

賓對曰某也既得見矣敢辭擯者對曰某也命某某非
敢為儀也敢以請

註曰還摯者請使受之

賓對曰某也夫子之賤私不足以踐禮敢固辭

註曰家臣稱私踐行也言某臣也不足以行賓客禮

擯者對曰某也使某不敢為儀也固以請賓對曰某固
辭不得命敢不從再拜受

註曰受其摯而去之○疏曰以其當為臣為輕既而

受其摯又相見無饗燕之禮故鄭云去之

下大夫相見以鴈飾之以布維之以索如執雉

註曰鴈取知時飛翔有行列也飾之以布謂裁縫衣其身也維謂繫聯其足

上大夫相見以羔飾之以布四維之結於面左頭如麇執之

註曰上大夫卿也羔取其從帥羣而不黨也面前也繫聯四足交出背上於胸前結之也如麇執之者秋

獻麋有成禮如之或曰麋孤之摯也其禮蓋謂左執前足右執後足○疏曰秋行饋麋則獻當在秋時也國皆有三卿五大夫言上大夫據三卿則此下是五大夫也三卿宜六大夫而五者何休云司馬事省闕一大夫案曲禮云飾羔鴈者以績彼天子卿大夫非直以布上又畫之此諸侯卿大夫摯雖同羔鴈直用布為飾無績

如士相見之禮

註曰大夫雖摯異其儀猶如士

始見於君執摯至下容彌威

註曰下謂君所也威猶促也促恭慙貌也其為恭士

大夫一也

庶人見於君不為容進退走

註曰容謂趨翔○疏曰行而張足曰趨行而張拱曰

翔

士大夫則奠摯再拜稽首君答壹拜

註曰言君答士大夫一拜則於庶人不答之庶人之
摯騫○疏曰君於士不答拜此得與大夫同答一拜
者士賤君不答拜此以新升為士故答拜聘禮問勞
云答士拜者亦以新使反故拜之

若他邦之人則使摯者還其摯曰寡君使某還摯賓對
曰君不有其外臣臣不敢辭再拜稽首受

疏曰凡臣無境外之交今得以摯見他邦君者謂他
國之君來朝此國之臣因見之若掌客卿皆見以羔

之類也

凡燕見於君必辨君之南面若不得則正方不疑君

註曰辨猶正也君南面則臣見正北面君或時不然當正東面若正西面不得疑君所處邪鄉之此謂特見國事非立賓主之燕也疑度之

君在堂升見無方階辨君所在

註曰升見升堂見於君也君近東則升東階君近西則升西階

凡言非對也妥而後傳言

註曰凡言謂已為君言事也妥妥安坐也傳言猶出言也若君問可對則對不待安坐也

與君言言使臣與大人言言事君與老者言言使弟子與幼者言言孝弟子父兄與衆言言忠信慈祥與居官者言言忠信

註曰博陳燕見言語之儀也言使臣者使臣之禮也大人卿大夫也言事君者臣事君以忠也祥善也居

金史四庫全書
卷三
官謂士以下○疏曰與衆言文承老幼之下亦非朝
臣但是鄉閭長幼共聚之處

凡與大人言始視面中視抱卒視面毋改衆皆若是

註曰始視面謂觀其顏色可傳言未也中視抱容其
思之且為敬也卒視面察其納已言否也毋改謂傳
言見答應之間當正容體以待之毋自變動為嫌懈
惰不虛心也衆謂諸卿大夫同在此者皆若是其視
之儀無異也

若父則遊目毋上於面毋下於帶

註曰子於父主孝不主敬所視廣也因觀安否何如也

若不言立則視足坐則視膝

註曰不言則伺其行起而已

凡侍坐於君子君子欠伸問日之早晏以食具告改居則請退可也

註曰君子謂卿大夫及國中賢者也志倦則欠體倦

則仲問日晏近於久也具猶辨也改居謂自變動也
夜侍坐問夜膳葷請退可也

註曰問夜問其時數也膳葷謂食之葷辛物蔥薤之
屬食之以止卧

若君賜之食則君祭先飯徧嘗膳飲而俟君命之食然
後食

註曰君祭先飯食其祭食臣先飯示為君嘗食也此
謂君與之禮食膳謂進庶羞既嘗庶羞則飲俟君之

編嘗也

若有將食者則俟君之食然後食

註曰將食猶進食謂膳宰也膳宰進食則臣不當食
周禮膳夫品嘗食王乃食

若君賜之爵則下席再拜稽首受爵升席祭卒爵而俟
君卒爵然後授虛爵

註曰受爵者於尊所至於授爵坐授人耳必俟君卒
爵者若欲其醕然也○疏曰醕盡爵也

退坐取屨隱辟而后屨君為之興則曰君無為興臣不敢辭君若降送之則不敢顧辭遂出

註曰謂君若食之飲之而退也隱辟俛而遂適興起也辭君興而不敢辭其降於已太崇不敢當也

大夫則辭退下比及門三辭

註曰下亦降也

若先生異爵者請見之則辭辭不得命則曰某無以見辭不得命將走見先見之

註曰先生致仕者也異爵謂卿大夫也辭辭其自降
而來走猶出也先見之者出先拜也曲禮曰主人敬
賓則先拜賓

非以君命使則不稱寡大夫士則曰寡君之老

註曰謂擯贊者辭也不稱寡君不言寡君之某言姓
名而已大夫卿士其使則皆曰寡君之某檀弓曰仕
而未有祿者君有饋焉曰獻使焉曰寡君之老

凡執幣者不趨容彌威以為儀

註曰不趨主慎也以進而益恭為威儀耳

執玉者則唯舒武舉前曳踵

註曰唯舒者重玉器尤慎也武跡也舉前曳踵備躔
踏也○朱先生曰陸佃讀武字絕句謂容彌威同唯
武則舒陸說近是

凡自稱於君士大夫則曰下臣宅者在邦則曰市井之
臣在野則曰草茅之臣庶人則曰刺草之臣他國之人
則曰外臣

註曰宅者謂致仕者去官而居宅或在國中或在野
周禮載師有宅田刺猶剡除也

儀禮述註卷三

欽定四庫全書

儀禮述註卷四

安溪 李光坡 撰

鄉飲酒禮第四

鄭目錄云諸侯之鄉大夫三年大比獻賢者能者於其君以禮賓之與之飲酒○疏曰知是諸侯之鄉大夫者案春官小胥云凡縣鐘磬半為堵全為肆註云鐘磬者編縣二八十六枚而在

一簋謂之堵鐘一堵磬一堵謂之肆半之者謂諸侯之卿大夫士也諸侯之卿大夫半天子之卿大夫西縣鐘東縣磬士亦半天子之士縣磬而已今此下惟縣磬而無鐘故以為諸侯鄉大夫也若然大夫亦應鐘磬俱有而直有磬者鄭云賓鄉人之賢者從士禮也若然天子鄉大夫賓賢能從士禮亦鐘磬俱有不獨磬也凡鄉飲酒之禮其名有四此賓賢能一也六十者坐五

十者立侍是黨正蜡祭飲酒二也州長春秋習射於序先行鄉飲酒三也鄉飲酒義又有鄉大夫士飲國中賢者用鄉飲酒四也其王制云習射尚功習鄉尚齒卽是州長黨正飲酒法

鄉飲酒之禮○主人就先生而謀賓介

註曰主人謂諸侯之鄉大夫也先生鄉中致士者賓介處士賢者周禮大司徒以鄉三物教萬民而賓興之及三年大比而興賢者能者鄉老及鄉大夫帥其

吏與其衆寡以禮禮賓之厥明獻賢能之書於王是
禮乃三年正月而一行也諸侯之鄉大夫貢士於其
君蓋如此云古者年七十而致仕老於鄉里大夫名
曰父師士名曰少師而教學焉恒知鄉人之賢者是
以大夫就而謀之賢者為賓其次為介又其次為衆
賓而與之飲酒是亦將獻之以禮禮賓之也今郡國
十月行此飲酒禮以黨正每歲邦索鬼神而祭祀則
以禮屬民而飲酒於序以正齒位之說然此篇無正

齒位之事焉凡鄉黨飲酒必於民聚之時欲其見化
知尚賢尊長也孟子曰天下有達尊三爵也德也齒
也○疏曰若據鄉貢一人其介與衆賓不貢之矣但
立介與衆賓輔賓行鄉飲酒之禮待後年選以貢之
耳案射義諸侯歲獻貢士注大國三人次國二人小
國一人大國三鄉次國二鄉小國一鄉所貢之士與
鄉同則鄉送一人至君所其國有遂數亦同其鄉并
有公邑采地皆有賢能貢之而貢士與鄉數同不言

遂與公邑采地所貢者蓋當鄉送一人至君所君又
總校德之大小取以貢之縱取鄉外仍准鄉數為定
鄉大夫雖行飲酒禮賓之於其君簡訖仍更行飲酒
禮賓之于王黨正正齒位之禮六十者坐五十者立
侍六十者三豆七十者四豆八十者五豆九十者六
豆年長者在上是正齒位之法也漢時十月飲酒禮
取黨正之文此篇則無黨正正齒位法也民聚之時
謂大比大蜡之時尚賢據此篇鄉飲酒尊長據黨正

鄉飲酒也但黨正飲酒以鄉大夫臨觀行禮或鄉大夫居此黨內則亦名鄉飲酒也引孟子者以證鄉大夫飲酒是尚德也黨正飲酒尚齒也爵於此無所當連引之耳或曰賓若有違之一章即尚爵之義也

主人戒賓賓拜辱主人答拜乃請賓賓禮辭許主人再拜賓答拜主人退賓拜辱

註曰戒告也拜辱出拜其自屈辱至已門也請告以其所為來之事不固辭者素所有志○朱先生曰學

金史四庫全書
卷四
成行脩進仕於朝上以致君下以澤民此士之素所
有志也

介亦如之

註曰如戒賓也○疏曰不言衆賓衆賓德劣但謀介
時亦當謀之故上註兼言其次為衆賓至於戒速之
日必當遣人戒速使知但略而不言故下云賓及衆
賓皆從之

乃席賓主人介

註曰賓席牖前南面主人席阼階上西面介席西階

上東面

衆賓之席皆不屬焉

註曰席衆賓於賓席之西不屬者不相續也皆獨坐

明其德各特

尊兩壺於房戶間斯禁有玄酒在西設篚於禁南東肆
加二勺於兩壺

註曰斯禁禁切地無足者玄酒在西上也肆陳也

疏曰言東肆以頭首為記從西向東為肆則大頭在
西也

設洗於阼階東南南北以堂深東西當東滌水在洗東
篋在洗西南肆

註曰滌屋翼○疏曰堂深謂從堂廡北至房屋之壁
堂下洗北去堂遠近深淺取於堂上深淺假令堂深
三文洗亦去堂三文以此為度

美定

註曰肉謂之羹定猶孰也

主人速賓賓拜辱主人答拜還

註曰速召也還猶退也

賓拜辱

疏曰聘禮云賓至近郊使下大夫至賓館遂以賓入
公食禮使大夫戒賓賓皆不拜送遂從之鄭注云不
拜送者為從之不終事皆不拜送此獨拜送者亦是
鄉大夫尊賓卑又擬貢故特拜辱而送之異於餘者

介亦如之賓及衆賓皆從之

註曰從猶隨也言及衆賓介亦在其中

主人一相迎於門外再拜賓賓答拜拜介介答拜

註曰相主人之吏擯贊傳命者

揖衆賓

註曰差益卑也拜介揖衆賓皆西南面

主人揖先入

註曰揖揖賓也先入門而西面

賓厭介入門左介厭衆賓入衆賓皆入門左北上

註曰皆入門西東面推手曰揖引手曰厭○疏曰引手曰厭者以手向身引之

主人與賓三揖至於階三讓主人升賓升主人阼階上當楣北面再拜賓西階上當楣北面答拜

註曰三揖者將進揖當陳揖當碑揖楣前梁也○疏曰楣前梁對後梁為室戶上

主人坐取爵于筐降洗

註曰將獻賓

賓降

註曰從主人

主人坐奠爵于階前辭賓對主人坐取爵興適洗南面坐奠爵于筐下盥洗

註曰已盥乃洗爵致潔故也

賓進東北面辭洗

註曰必進東行示情○疏曰言東北面則位南於洗

矣是其賓初降立至於洗南東鄉至主人洗爵乃東
行故此得北面辭洗也示情者賓進前就主人示謙
下主人之情也

主人坐奠爵於篚興對賓復位當西序東面

註曰始降位在此

主人坐取爵沃洗者西北面

註曰沃洗主人之羣吏

卒洗主人壹揖壹讓升

疏曰鄉射云主人卒洗一揖一讓以賓升是俱升也
上文主人先升賓乃升者以初至之時賓客之道進
宜難故主人升導之至此以辭讓訖故略威儀而俱
升也

賓拜洗主人坐奠爵遂拜降盥

註曰復盥為手盥汗

賓降主人辭賓對復位當西序卒盥揖讓升賓西階上
疑立

註曰疑正立自定之貌

主人坐取爵賓之賓之席前西北面獻賓

疏曰賓在西階北面將就席受故西北面向其席也

賓西階上拜主人少退賓進受爵以復位

註曰復西階上位

主人作階上拜送爵賓少退薦脯醢

註曰薦進也進之者主人有司

賓升席自西方

註曰升由下也升心中席○疏曰案曲禮云席南鄉北鄉以西方為上今升席自西方云升由下者以賓統於主人以東方為上故以西方為升由下也

乃設折俎

註曰牲體枝解節折在俎

主人阼階東疑立賓坐左執爵祭脯醢

註曰坐坐於席祭脯醢者以右手

奠爵于薦西興右手取肺卻左手執本坐弗繚右絕末

以祭尚左手齊之興加于俎

註曰肺離之本端厚大者繚猶紵也尚左手者明垂
紵之乃絕其末齊嘗也○疏曰真爵于薦右者為取
肺真之將舉故奠于右記云取俎進俎不坐是以取
時真爵興至加于俎又興也本謂根本肺之大端此
鄉飲酒大夫禮故云繚祭鄉射士禮云絕祭但云繚
必兼絕言絕不得兼繚也周禮大祝辨九祭七曰絕
祭八曰繚祭注云繚祭以手從肺本循之至于末乃

絕以祭絕祭不循其末直絕以祭二祭本同禮多者
繹之禮略者絕則祭之云齎嘗也者齎至齒則嘗之
也

坐挽手遂祭酒興席末坐啐酒降席坐奠爵拜告旨執
爵興主人作階上答拜

註曰挽拭也降席席西也

賓西階上北面坐卒爵興坐奠爵遂拜執爵興主人作
階上答拜

註曰卒盞也於此盞酒者明此席非專為飲酒起
疏曰此席非專為飲酒起為賓賢能起故不在席盞
爵於此西階上卒之

賓降洗

註曰將酢主人

主人降

註曰降立阼階東西面

賓坐奠爵與辭

金匱要略卷之四
本四
註曰西階前也

主人對賓坐取爵適洗南北面主人阼階東南面辭洗
賓坐奠爵于筐與對主人復阼階東西面賓東北面盥
坐取爵卒洗揖讓如初升主人拜洗賓答拜興降盥如
主人禮賓實爵主人之席前東南面酢主人主人阼階
上拜賓少退主人進受爵復位賓西階上拜送爵薦脯
醢主人升席自北方設折俎祭如賓禮

註曰祭者祭薦俎及酒亦嘑啐○疏曰鄉射賓盥訖

將洗主人乃辭洗禮之常也此將賓舉之故未盥而辭洗以重之也

不告旨

註曰酒已物也

自席前適阼階上北面坐卒爵興坐奠爵遂拜執爵興賓西階上答拜

註曰自席前者啐酒席末因從北方降由便也○疏曰曲禮席東鄉西鄉以南方為上南鄉北鄉以西方

為上凡升席必由下降由上今主人當降自南方以
卒酒於席末遂因從席北頭降又從北向南北面拜
是由便也

主人坐奠爵于序端阼階上北面再拜崇酒賓西階上
答拜

註曰東西牆謂之序崇充也言酒惡相充實○疏曰
賓告旨甘主人之味故啐則拜之主人謝賓以酒惡
相充實故飲訖乃拜

主人坐取解于筐降洗賓降主人辭降賓不辭洗立當
西序東面

註曰不辭洗者以其將自飲

卒洗揖讓升賓西階上疑立主人實解酬賓阼階上北
面坐奠解遂拜執解興賓西階上答拜

註曰酬勸酒也酬之言周忠信為周

坐祭遂飲卒解興坐奠解遂拜執解興賓西階上答拜
主人降洗賓降辭如獻禮升不拜洗

註曰不拜洗殺於獻○疏曰辭如獻禮者主人辭賓降賓辭主人為已洗爵此與獻賓時同

賓西階上立主人實解賓之席前北面賓西階上拜主人少退卒拜進坐奠解于薦西

註曰賓已拜主人奠其解

賓辭坐取解復位主人阼階上拜送賓北面坐奠解于薦東復位

註曰酬酒不舉君子不盡人之歡不竭人之忠以全

交也

主人揖降賓降立于階西當序東面

註曰主人將與介為禮賓謙不敢居堂上

主人以介揖讓升拜如賓禮主人坐取爵于東序端降洗介降主人辭降介辭洗如賓禮升不拜洗

註曰介禮殺也。○疏曰主人與賓三揖至階之時介與衆賓亦隨至西階下東面今此文云揖讓升如賓禮則唯于升堂時相讓無庭中三揖之事矣升堂而

云拜者謂拜至亦如賓矣

介西階上立

註曰不言疑者省文

主人實爵介之席前西南面獻介介西階上北面拜主人少退介進北面受爵復位主人介右北面拜送爵介少退

註曰主人拜于介右降尊以就卑也

主人立于西階東薦脯醢介升席自北方設折俎祭如

賓禮不齊肺不啐酒不告旨自南方降席北面坐卒爵
興坐奠爵遂拜執爵興主人介右答拜

註曰不啐齊下賓

介降洗主人復酢階降辭如初

註曰如賓酢之時○疏曰云如初者如賓酢主人之
時介辭主人從已降主人辭介為已洗也

卒洗主人盥

註曰盥者當為介酌○疏曰此主人自飲而盥者尊

介也

介揖讓升授主人爵于兩楹之間

註曰就尊南授之介不自酌下賓酒者賓主共之○
疏曰知兩楹間是尊南者以上云尊於房戶之間房
戶間當兩楹之北也

介西階上立主人實爵酢于西階上介右坐奠爵遂拜
執爵興介答拜主人坐祭遂飲卒爵興坐奠爵遂拜執
爵興介答拜主人坐奠爵于西楹南

註曰以爵獻衆賓

介右再拜崇酒介答拜主人復阼階揖降介降立于賓

南

主人西南面三拜衆賓衆賓皆答壹拜

註曰不升拜賤也

主人揖升坐取爵于西楹下降洗升實爵于西階上獻
衆賓衆賓之長升拜受者三人

疏曰云主人揖升者從三人為首一一揖之而升也

云降洗升實爵者以下不更言洗則以下因此不復洗矣云拜受者三人則堂下衆賓不拜受矣

主人拜送

註曰於衆賓右

坐祭立飲不拜既爵授主人爵降復位

註曰既卒也卒爵不拜立飲立授賤者禮簡

衆賓獻則不拜受爵坐祭立飲

註曰次三人以下也不拜禮彌簡

每一人獻則薦諸其席

註曰謂三人也

衆賓辨有脯醢

註曰亦每獻薦於其位位在下今文辨皆作偏○疏曰以其言堂下立侍不合有席故不言席而云位在下也不言其數者鄉人有學識者皆來觀禮皆入飲酒之內是以鄉射云旅酬堂上辨卒受者興以旅在下者明衆賓在堂下也

主人以爵降奠于篚

揖讓升賓厭介升介厭衆賓升衆賓序升即席

註曰序次也即就也

一人洗升舉解於賓

註曰一人主人之吏發酒端曰舉

實解西階上坐奠解遂拜執解興賓席末答拜坐祭遂
飲卒解興坐奠解遂拜執解興賓答拜降洗升實解立
於西階上賓拜

註曰賓拜拜將受解○疏曰云賓席末答拜者謂於
席西南面非謂席上近西為末以其無席上拜法也
已下賓拜皆然

進坐奠解於薦西賓辭坐受以興

註曰舉解不授下主人也言坐受者明行事相接若
親受謙也○疏曰若於人手相接受則名為受不於
人取之不得言受今於地取之而言受者以主人奠
之賓取之而無隔絕雖於地若手受之也

禮記卷之八十一
卷四
舉解者西階上拜送賓坐奠解於其所

註曰所薦西也

舉解者降

註曰事已

設席於堂廡東上

註曰為工布席也側邊曰廡燕禮曰席工於西階上
少東樂正先升北而北言樂正先立於西階東則
工席在階東

工四人二瑟瑟先相者二人皆左何瑟後首跨越內弦
右手相

註曰四人大夫制也二瑟二人鼓瑟則二人歌也瑟
先者將入序在前也相扶工也衆賓之少者為之每
工一人鄉射禮曰弟子相工如初入天子相工使視
瞭者凡工瞽矇也故有扶之者師冕見及階子曰階
也及席子曰席也固相師之道後首者變於君也擗
持也相瑟者則為之持瑟其相歌者佻相也越瑟下

孔也內弦側擔之者○疏曰工四人二人瑟相二人則工二人歌雖不言相亦二人可知以空手無事故不言也燕禮云小臣左何瑟而鼓注云燕尚樂可鼓者在前面也此不面鼓是變於君也

樂正先升立於西階東

註曰正長也

工八升自西階北面坐相者東面坐遂授瑟乃降

註曰降立於西方近其事○疏曰鄉射云樂正適西

方命弟子贊工遷樂故知西方是近其事也

工歌鹿鳴四牡皇皇者華

註曰三者皆小雅篇也鹿鳴君與臣下及四方之賓
燕講道修政之樂歌也此采其已有旨酒以召嘉賓嘉
賓既來視我以善道又樂嘉賓有孔昭之明德可則
倣也四牡君勞使臣之來樂歌也此采其勤苦王事
念將父母懷歸傷悲忠孝之至以勞賓也皇皇者華
君遣使臣之樂歌也此采其更是勞苦自以為不及

欲諮謀於賢知而以自光明也。○朱先生曰：鹿鳴謂今日燕飲之事，所以道達主人之誠意而美嘉賓之德也。四牡言其去家而仕於朝，辭親而從王事於此乎始也。皇皇者華言其將為君使而賦政於外也。學記曰：宵雅肄三官其始也。正謂此也。蓋此三詩先王所制以為燕飲之樂用之，鄉人用之，邦國各取其象而歌之也。

卒歌主人獻工

註曰鄉射禮曰取爵於上筐獻工

工左瑟一人拜不興受爵主人阼階上拜送爵

註曰一人工之長也凡工賤不為之洗

薦脯醢使人相祭

註曰使人相者相其祭酒祭薦

工飲不拜既爵授主人爵

註曰坐授之

衆工則不拜受爵祭飲辨有脯醢不祭

註曰祭飲獻酒重無不祭也○疏曰下記云凡旅不洗不洗者不祭註云敬禮殺也不甚潔也此衆工亦不洗而祭故云獻酒重無不祭也

大師則為之洗賓介降主人辭降工不辭洗

註曰大夫若君賜之樂謂之大師則為之洗尊之也賓介降從主人也工大師也上既言獻工矣乃言大師者大師或瑟或歌也其獻之瑟則先歌則後

笙入堂下磬南北面立樂南陔白華華黍

註曰笙吹笙者也以笙吹此詩以為樂也南陔白華
華黍小雅篇也今亡其義未聞昔周之興也周公制
禮作樂采時世之詩以為樂歌所以通情相風切也
其有此篇明矣後世衰微幽厲尤甚禮樂之書稍稍
廢棄孔子曰吾自衛反魯然後樂正雅頌各得其所
謂當時在者而復重雜亂者也惡能存其亡者乎且
正考父校商之名頌十二篇于周大師歸以祀其先
王至孔子二百年之間五篇而已此其信也○劉敞

曰此三篇皆笙詩也小序云有其義而亡其辭亡謂本無非亡逸之亡也鄉飲酒禮鼓瑟而歌鹿鳴四牡皇皇者華然後笙入堂下磬南北而立樂南陔白華華黍燕禮亦鼓瑟歌鹿鳴四牡皇皇者華然後笙入立於縣中奏南陔白華華黍南陔以下今無以考其名篇之義然曰笙曰樂曰奏而不言歌則有聲而無詞明矣下由庚崇丘由儀放此

主人獻之於西階上一人拜盡階不升堂受爵主人拜

送爵階前坐祭立飲不拜既爵升授主人爵

註曰一人笙之長者也笙三人和一人凡四人鄉射

禮曰笙一人拜于下○疏曰一人拜者謂在地拜

衆笙則不拜受爵坐祭立飲辯有脯醢不祭

註曰亦受爵於西階上薦之皆於其位磬南

乃間歌魚麗笙由庚歌南有嘉魚笙崇丘歌南山有臺

笙由儀

註曰間代也謂一歌則一吹六者皆小雅篇也魚麗

言太平年豐物多也此采其物多酒旨所以優賓也
南有嘉魚言太平君子有酒樂與賢者共之也此采
其能以禮下賢者賢者纍蔓而歸之與之燕樂也南
山有臺言太平之治以賢者為本此采其愛友賢者
為邦家之基民之父母既欲其身之壽考又欲其名
德之長也由庚崇丘由儀今亡其義未聞○疏曰堂
下吹笙堂上升歌間代而作故謂之乃間也

乃合樂周南關雎葛覃卷耳召南鵲巢采芣采蘋

註曰合樂者謂歌樂與衆聲俱作也周南召南國風
篇也王后國君夫人房中之樂歌也閟雎言后妃之
德葛覃言后妃之職卷耳言后妃之志鵲巢言國君
夫人之德采芣言國君夫人不失職采蘋言卿大夫
之妻能循其法度昔大王王季居於岐山之陽躬行
召南之教以興王業及文王而行周南之教以受命
大雅云刑于寡妻至于兄弟以御于家邦謂此也其
始一國耳文王作邑于豐以故地為卿士之采地乃

分為二國周周公所食召召公所食于時文王三分天下有其二德化被於南土是以其詩有仁賢之風者屬之召南焉有聖人之風者屬之周南焉夫婦之道生民之本王政之端此六篇者其教之原也故國君與其臣下及四方之賓燕用之合樂也鄉樂者風也小雅為諸侯之樂大雅頌為天子之樂鄉飲酒升歌小雅禮威者可以進取也燕合鄉樂禮輕者可以遠下也春秋傳曰肆夏繁遏渠天子所以享元侯也

文王大明絳兩君相見之樂也然則諸侯相與燕升
歌大雅合小雅天子與次國小國之君燕亦如之與
大國之君燕升歌頌合大雅其笙間之篇未聞○疏
曰歌樂衆聲俱作者謂堂上有歌瑟堂下有笙磬合
奏此詩也○朱先生曰二南之分注疏說未安唯程
子曰以周公主內治故以畿內之詩言文王太姒之
化者屬之周南以召公掌諸侯故以畿外之詩言列
國諸侯大夫之室家者屬之召南此為得之謂之南

者言其化自岐雍之間被於江漢之域自北而南也
詩曰以雅以南即謂此也

工告於樂正曰正歌備樂正告於賓乃降

註曰樂正降者以正歌備無事也降立西階東北面
○疏曰以其上堂時在西階之東北面知降堂下亦
然在笙磬之西亦得監堂下之樂知位在此也

主人降席自南方

註曰不由北方由便○疏曰主人之席南上升由下

降由上是其常而言由便者解禮所以升由下降由上者是由便也

側降

註曰賓介不從○疏曰側特也賓介不從故言側

作相為司正司正禮辭許諾主人拜司正答拜

註曰作使也禮樂之正既成將留賓為有懈惰立司正以監之拜拜其許

主人升復席

司正洗解升自西階阼階上北面受命於主人主人曰
請安於賓司正告於賓賓禮辭許

註曰為賓欲去留之告賓於西階

司正告於主人主人阼階上再拜賓西階上答拜司正
立於楹間以相拜皆揖復席

註曰再拜拜賓許也司正既以賓許告主人遂立楹
間以相拜賓主人既拜揖就席

司正實解降自西階階間北面坐奠解退共少立

註曰階間北面東西節也其南北當中庭共拱手也
少立自正慎其位也已帥而正執政不正燕禮曰右

還北面

坐取解不祭遂飲卒解興坐奠解遂拜執解興盥洗北
面坐奠解於其所退立於解南

註曰洗解奠之示潔故立於其南以察衆○疏曰據
鄉射大射皆不云盥此有盥字者誤合刪去

賓北面坐取俎西之解作階上北面酬主人主人降席

立於賓東

註曰初起旅酬也凡旅酬者少長以齒終於沃盥者皆第長而無遺矣○疏曰前一人舉解奠於薦右今取為旅酬記云主人之贊者西而北上不與與及也言不及獻酒則旅酬亦不與矣旅酬所以酬正獻也記又云無算爵然後與此旅酬得終於沃洗者鄭解酬之大法故連引無算爵旅酬而言終沃洗也其實此時未及沃洗也

賓坐奠解遂拜執解興主人答拜不祭立飲不拜卒解
不洗實解東南面授主人

註曰賓立飲卒解因更酌以鄉主人將授

主人阼階上拜賓少退主人受解賓拜送於主人之西

註曰旅酬同階禮殺

賓揖復席

註曰酬主人訖

主人西階上酬介介降席自南方立於主人之西如賓

酬主人之禮主人揖復席

註曰其酌實解西南面授介自此以下旅酌酌者亦如之

司正升相旅曰某子受酬受酬者降席

註曰旅序也於是介酬衆賓衆賓又以次序相酬某者衆賓姓也同姓則以伯仲別之又同則以其序別之

司正退立於序端東面

註曰辟受酬者又使其贊上贊下也始升相西階西
北面

受酬者自介右

註曰由介東也尊介使不失故位○疏曰北面以東
為右故云由介東也凡授受之法者授由其右受由
其左此受介酬者應自介左而自介右者介位在西
故云尊介使不失故位也

衆受酬者受自左

註曰後將受酬者皆由西變於介也○疏曰言衆受
酬者謂上衆賓之內為首者一人自介右受之自第
二以下并堂下衆賓皆自左受之言變於介者即是
授受之常法也

拜興飲皆如賓酬主人之禮

註曰嫌賓以下異也

辯卒受者以解降坐奠於筐

註曰辯辯衆賓之在下者鄉射禮曰辯遂酬在下者

皆升受酬於西階上

司正降復位

註曰解南之位

使二人舉解於賓介洗升實解於西階上皆坐奠解遂
拜執解興賓介席末答拜皆坐祭遂飲卒解興坐奠解
遂拜執解興賓介席末答拜

註曰二人亦主人之吏若有大夫則舉解于賓與大
夫燕禮曰媵爵者立于洗南西面北上序進盥洗○

疏曰若有大夫則舉解于賓與大夫者以其大夫尊於介故也

逆降洗升實解皆立于西階上賓介皆拜

註曰於席末拜○疏曰賓在席西南而介在席南東面

皆進薦西奠之賓辭坐取解以興介則薦南奠之介坐受以興退皆拜送降賓介奠于其所

註曰賓言取介言受尊卑異文

司正升自西階受命於主人主人曰請坐於賓賓辭以
俎

註曰至此威禮俱成酒清肴乾賓主百拜強有力者
猶倦焉張而不弛弛而不張非文武之道請坐者將
以賓燕也俎者肴之貴者辭之者不敢以禮殺當貴
者○疏曰燕禮司正奠解于中庭請徹俎而坐此禮
司正監旅訖二人舉解後將行無算爵始請坐于賓
燕禮司正之前云二人致爵三舉旅得爵多故司正

真時即坐燕此禮由來未行旅酬故使二人舉解徹
俎後乃坐也

主人請徹俎賓許

註曰亦司正傳請告之

司正降階前命弟子俟徹俎

註曰西階前也弟子賓之少者俎者主人之吏設之
使弟子俟徹者明徹俎賓之義

司正升立於席端

註曰待事

賓降席北面主人降席阼階上北面介降席西階上北面
導者降席席東南面

註曰皆立相須徹俎也導者謂此鄉之人仕至大夫
者也今來助主人樂賓主人所榮而遵法者也因以
為名或有無來不來用時事耳

賓取俎還授司正司正以降賓從之主人取俎還授弟
子弟子以降自西階主人降自阼階介取俎還授弟子

弟子以降介從之若有諸公大夫則使人受俎如賓禮
衆賓皆降

註曰取俎者皆鄉其席既授弟子皆降復初入之位
說屨揖讓如初升坐

註曰說屨者為安燕當坐也必說於下者屨賤不宜
居堂說屨主人先左賓先右

乃羞

註曰羞進也所進者狗彘醢也鄉設骨體所以致敬

也今進羞所以盡愛也敬之愛之所以厚賢也○疏
曰下祀云其牲狗禮記又云薦羞不踰牲則所羞者
狗馘也但醢是舊作之物諸經又不見以狗作醢則
馘必狗也醢則當兼有餘牲也

無算爵

註曰算數也賓主燕飲爵行無數醉而止也鄉射禮
曰使二人舉解于賓與大夫又曰執解者洗升實解
反奠于賓與大夫皆是○楊氏曰鄉飲酒禮無算爵

其文略注疏引鄉射無筭爵以釋之按鄉射無筭爵
賓與大夫不與取奠解飲卒解不拜執解者受解遂
實之賓解以之主人大夫之解衆賓長受而錯皆不
拜注錯者實主人之解以之次賓實賓長之解以之
次大夫此鄉飲酒禮亦同但鄉射有賓無介鄉飲酒
有賓有介當實賓之解以之主人實大夫之解以之
介及其交錯而行也當實主人之解以之衆賓長實
介之解以之次大夫又實衆賓長之解以之第三位

次大夫賓次大夫之解以之第二位次賓長如此交錯以辨卒受者與以旅在下者于西階上及其辨也執解者洗升賓解反奠于賓與大夫所以復奠之者燕以飲酒為歡醉乃止此所以為無算爵也

無算樂

註曰燕樂亦無數或間或合盡歡而止也春秋襄二十九年吳公子札來聘請觀于周樂此國君之無算也

賓出奏陔

註曰陔陔夏也陔之言戒也終曰燕飲酒罷以陔為節明無失禮也周禮鍾師以鍾鼓奏九夏是奏陔夏則有鍾鼓矣鍾鼓者天子諸侯備用之大夫士鼓而已蓋建于阼階之西南鼓鄉射禮曰賓興樂正命奏陔賓降及階陔作賓出衆賓皆出

主人送于門外再拜

註曰門東西面而拜也賓介不答拜禮有終也

賓若有尊者諸公大夫則既一人舉解乃入

註曰不干主人正禮也尊者諸公大夫也謂之賓者同從外來耳大國有孤四命謂之公

席於賓東公三重大夫再重

註曰席此二者於賓東尊之不與鄉人齒也天子之國三命者不齒於諸侯之國爵為大夫則不齒矣不言尊者尊者亦卿大夫

公如大夫入主人降賓介降衆賓皆降復初位主人迎

揖讓升公升如賓禮辭一席使一人去之

註曰主人迎之于門內也辭一席讓自同于大夫

大夫則如介禮有諸公則辭加席委于席端主人不徹
無諸公則大夫辭加席主人對不去加席

註曰加席上席也大夫席再重

明日賓服鄉服以拜賜

註曰拜賜謝恩惠鄉服昨日與鄉大夫飲酒之朝服

也不言朝服未服以朝也○疏曰此賓言鄉服其鄉

射賓言朝服不同者按鄉射以公士為賓謂在朝者朝服是其常此賓鄉人子弟未仕雖著朝服仍以鄉服言之故也

主人如賓服以拜辱

註曰拜賓復自屈辱也鄉射禮曰賓朝服以拜賜於門外主人不見如賓服遂從之拜辱於門外乃退○疏曰彼此賓主皆不相見造門外拜謝而已

主人釋服

註曰釋朝服更服玄端也

乃息司正

註曰息勝也勞賜昨日贊執事者獨云司正司正庭長也

無介

註曰勞禮略也司正為賓

不殺

註曰市買若因所有可也不殺則無俎

薦脯醢

註曰羞同也○疏曰真正行飲酒同

羞唯所有

註曰在有何物

徵唯所欲

註曰徵召也○疏曰昨日正行飲酒不得喚親友故
今禮食之餘可別召知友也

以告于先生君子可也

註曰告請也先生不以筋力為禮於是可以來君子
國中有盛德者可者召不召唯所欲

賓介不與

註曰禮濟則褻

鄉樂唯欲

註曰鄉樂周南召南六篇之中唯所欲作不從次也
不歌鹿鳴魚麗者辟國君也

記鄉朝服而謀賓介皆使能不宿戒

註曰鄉鄉人謂鄉大夫也朝服冠玄端緇帶素鞵白屨再戒為宿戒禮將有事先戒而後宿戒

蒲筵緇布純

註曰筵席也純綠也

尊綌冪賓至徹之

註曰綌葛也冪覆尊巾

其牲狗也

註曰狗取擇人

金匱要略卷四
卷四
亨于堂東北

註曰祖陽氣之所始也陽氣主養

獻用爵其他用解

註曰爵尊不褻用之○楊氏曰上篚在禁南東肆下
篚在洗西南肆上篚爵三解一獻賓獻遵獻工皆異
爵三也主人取解降洗以酬賓一也下篚之解四一
人舉解為旅酬始一也司正舉解二也二人舉解為
無算爵始四也

薦脯五挺橫祭于其上出自左房

註曰挺猶臠也鄉射禮曰祭半臠臠長尺有二寸左
在東陽也陽主養房饌陳處也冠禮之饌脯醢南上
由禮曰以脯脩置者左胸右末○疏曰此橫祭于其
上者於脯為橫於人為縮其挺有五通祭者六

俎由東壁自西階升

註曰亨狗既孰載之俎饌於東方○疏曰亨狗於東
方孰乃載之於俎饌陳於東壁既饌於東方恐由東

階升故記辨之云自西階升也

賓俎脊脅肩肺主人俎脊脅臂肺介俎脊脅胙肺肺皆
離皆右體進腩

註曰凡牲前脰骨三肩臂臑也後脰骨二膊胙也尊
者俎尊骨卑者俎卑骨祭統曰凡為俎者以骨為上
骨有貴賤凡前貴後賤離猶揜也腩理也進理謂前
其本也今天胙作胙○疏曰此序體賓用肩主人用
臂介用胙前貴于後也其間有臑肫在而介不用者

蓋以大夫俎故此闕焉○朱先生曰肫字釋文無音
疏又云有臄肫而介不用明本無此字也合刪

以爵拜者不徒作

註曰作起也言拜既爵者不徒起起必酢主人

坐卒爵者拜既爵立卒爵者不拜既爵

註曰降殺各從其宜不使相錯唯工不從此禮○疏

曰以其工無目故不使立卒爵唯坐卒爵不拜既爵

與立卒爵者同

凡奠者於左

註曰不欲者不欲其妨○疏曰謂主人酬賓之解主人奠於薦右客不盡主人之歡奠之於左是不欲其妨後奠爵也

將舉於右

註曰便也○疏曰謂若上文一人舉解為旅酬使二人舉解為無算爵始皆奠於右

衆賓之長一人辭洗如賓禮

註曰於三人之中復差有尊者餘二人雖為之洗不敢辭其下不洗

立者東面北上若有北面者則東上

註曰賢者衆寡無常也或統於堂或統於門○疏曰此謂堂下立者鄉人賢者或多或少若少則東面上統於堂也若多東面立不盡即門西北面東上統於門也

樂正與立者皆薦以齒

註曰謂其飲之次也尊樂正同於賓黨不言飲而言薦以明飲也既飲皆薦於其位樂正位西階東北面凡舉爵三作而不徒爵

註曰謂獻賓獻大夫獻工皆有薦

樂作大夫不入

註曰後樂賢也

獻工與笙取爵于上篚既獻奠于下篚

註曰明其異器敬也如是則獻大夫亦然上篚三爵

○疏曰獻賓獻衆賓北降奠于篚是上篚一爵也
獻工與笙既獻奠于下篚是上篚二爵也又鄉射禮
云主人以爵降洗獻大夫此篇亦有大夫故知上篚
有三爵也

其笙則獻諸西階上

註曰謂主人拜送爵也於工拜于阼階上者以其坐
於西階東也○疏曰以工坐於西階東主人不得西
階上拜送爵故也此笙在西階獻於西階上嫌亦阼

階拜送故此明之也

磬階間縮雷北面鼓之

註曰縮從也雷以東西為從鼓猶擊也大夫而特縣
方賓鄉人之賢者從士禮也射則磬在東○疏曰磬
階間者在堂下兩階之間東西節也縮從也上當堂
之南雷南北節也凡東西為橫南北為從南雷則以
東西為從謂之縮雷○楊氏曰春官小胥正樂縣之
位王宮縣諸侯軒縣卿大夫判縣士特縣宮縣四面

象宮室軒縣三面去南面辟王也判縣判左右二面
又去北面特縣縣於東方或於階間而已凡鍾磬編
縣二十八枚而在一虞謂之堵鍾一堵磬一堵謂
之肆所謂卿大夫判縣者天子之卿大夫判縣左右
二肆鍾磬各二堵也士特縣一肆鍾磬各一堵也諸
侯之卿大夫半天子之卿大夫判縣一肆西鍾東磬
各一堵也諸侯之士半天子之士縣磬一堵而已射
則避射位故鄉射磬在東鄉飲則在階間縮雷也鄉

飲諸侯之大夫禮以其賓鄉人之賢者從士禮也

主人介凡升席自北方降自南方

註曰席南上升由下降由上由便

司正既舉解而薦諸其位

註曰司正主人之屬也無獻因其舉解而薦之○疏

曰下文云主人之贊者西而北上不與無筭爵然後

與是其無獻也故因舉解薦諸其位

凡旅不洗

註曰敬禮殺也

不洗者不祭

註曰不甚潔也

既旅士不入

註曰後正禮也既旅則將燕矣

徹俎賓介尊者之俎受者以降遂出授從者

註曰送之

主人之俎以東

註曰藏於東方

樂正命奏陔賓出至于階陔作

若有諸公則大夫於主人之北西面

註曰其西面者北上統於公

主人之贊者西面北上不與

註曰贊佐也謂主人之屬佐助主人禮事徹籩沃盥

設薦俎者西面北上統於堂也與及也不及謂不獻

酒

無算爵然後與

註曰燕乃及之



儀禮述註卷四